

2 TIMOTI

¹ E Pol. Kristus Yesus na e qarınbej deqa e aqa anjam mare mare laqnum. Qotei aqa segi areqalo na e wau di ebej deqa e na tamo unğasari nanğı endegsi minjreqnum, “Ninğı Kristus Yesus qa nunğo areqalo şingilatqab di ninğı nambile oqab.” Nambile di Qotei a nami iga egwa marej.

² O Timoti, ni ijo anğro bole bulonum. E anjam endi nenğrenyosim inoq qarınyonum. Tamo Koba Kristus Yesus aqa Abu Qotei wo nanğı aiyel ni qa dulosis are boleınjrimqa ni lawo na soqnime.

Iga Yesus aqa anjam bole qa jemaigwasai

³ Ijo moma nanğı nami Qotei aqa wau ojoqneq dego kere e bini Qotei aqa wau ojeqnum. Ijo moma nanğı are miligiq di nanğı qalieeb, nanğı Qotei aqa nğangalaq di une saıqoji soqneq. E segi dego ijo are miligiq di degsi qalieonum. Deqa Timoti, e qolo ti qanam ti Qotei pailyoqnsim ni qa are qaloqnsim Qotei binjiyeqnum. ⁴ Nami e ni uratmqa laqnamqa ni e qa are ugeimonaqa akamem. E deqa are qaloqnsim ni olo numqajqa are koba unu. E ni numsiyqa tulan areboleboleibqas.

⁵ Nami ino moma Lois wo ino ai Yunis wo nanğı aiyel Yesus qa nanğı areqalo şingilatoqneq dego kere bini ni Yesus qa ino areqalo şingilateqnum. Utru deqa e ni numqajqa are qaloqnsim unum.

⁶ Nami e ijo bağ ino gateq di atnamqa Qotei na ni aqa wau ojğajqa deqa şingila emej. Deqa e ino areqalo tigeltetmitqa ni şingila deqa olo are qaloqnsim wau di şingilatoqne. Tamo a nğam puyim

puloŋosim kobaqas dego kere ni ino wau di olo siŋgilatim kobaqas. ⁷Ni qalie, Qotei na iga ulaqajqa deqa aqa Mondor egosai. Iga siŋgila ti qalaqalaiyo kumbra ti areqalo bole ti sqajqa deqa osiq aqa Mondor egej.

⁸ Deqa ni gago Tamo Koba aqa anjam qa jemaimaiq. Ni e qa dego jemaimaiq. E Yesus aqa anjam mare mare laqnem deqa jeu tamo nanŋi na e ojsib tonto talq endi waibeb unum. Deqa ni na e beterbosim Qotei aqa siŋgila ti sosim Yesus aqa anjam bole mare mare laqne. Osim dena ni e ombla gulbe oqnsim sqom. ⁹ Qotei na iga elenosiqa iga aqa segi kumbra boleq di sqajqa deqa are qalsiq metgej. Iga wau bole bole yoqnem Qotei a deqa osiq iga metgosai. Tulaŋ nami a iŋgi iŋgi kalil atosaisosiqa a aqa segi areqalo na iga metgej. Osiqa iga qa are boleiyosiqa Kristus Yesus qarinyosiqa dena iga elenjej. ¹⁰ Bati kereonaqa Kristus Yesus agi iga elenjej qaji a boleq dosiqa moiyo aqa siŋgila kobotej. Aqa kumbra dena Qotei a iga qa are boleiyej. E Yesus aqa anjam bole mare mare laqnum gam dena tamo uŋgasari nanŋi endegsi poinjreqnu, “Bole, iga moiqasai. Iga ŋambile gaigai sqom.”

¹¹ E Yesus aqa anjam bole palontqajqa ti plaltqajqa ti deqa Qotei na e giltbej. ¹² Deqa uŋgum, e gulbe oqnsiy sqai. E deqa jemaibqasai. E Yesus qa ijo areqalo siŋgilateqnum. E a qa qalie bole. A e wau ebej deqa e qalieonum, a na wau di geregere taqatoqnsim gilsim a olo bqajqa bati brantqas.

¹³ O Timoti, anjam bole kalil e nami ni mermoqnem qaji di ni geregere dauryoqnsim palontoqne. Osim Kristus Yesus qa ino areqalo

siŋgilatoqnsim a qalaqalaiyoqne. ¹⁴ Qotei na aqa anjam bole di ino banq di atej. Anjam di tulan bolequja. Deqa ni anjam di geregere taqatesoqne. Mondor Bole agi gago are miligiq di unu qaji a na ni aqaryaimoqnmqa ni Qotei aqa wau geregere ojsim laqne.

¹⁵ Ni qalie, tamo kalil Esia sawaq di unub qaji nanqi e uratbosib jaraiyeb. Figelus Hermogenes wo nanqi aiyel dego e uratbosib jaraiyeb.

¹⁶ E endegsi pailyeqnum, “O Tamo Koba, ni Onesiforus aqa tal qujai nanqi qa dulame.” O Timoti, Onesiforus a bati gargekoba ijo are boletetboqnej. E tonto talq di soqnem bati deqa a e qa jemaiyosai. ¹⁷ A Rom qureq bosiq dia e qa namosiq itbej. ¹⁸ Deqa e a qa endegsi pailyeqnum, “O Tamo Koba, mondon ni na tamo ungasari nanqi peginjrqqa batiamqa ni Onesiforus a qa dulame.” O Timoti, nami Efesus qureq di dego Onesiforus a e qa wau gargekoba yoqnsiqa aqaryaiboqnej. Di ni qalie.

2

Pol na Timoti minjej, “Ni Yesus aqa qoto tamo bulosim gulbe qoboiyesoqne”

¹ O ijo angro Timoti, Kristus Yesus a iga qa are boleiyeqnu aqa kumbra dena ni siŋgilatmoqneme. ² E tamo gargekoba nanjo namgalaq di Qotei aqa anjam palontoqnem di ni quoqnem. Anjam di ni na olo tamo qudei Yesus bole dauryeqnub qaji nanqi dego minjroqnmqa nanqi kamba tamo qudei nanqi minjroqngab.

³ Ni e ombla Kristus Yesus aqa qoto tamo bulosim gulbe qoboyesoqne. ⁴ Qoto tamo nanngo kumbra di ni qalie. Nanngi qotqajqa wau ojoqnsib olo wau bei qa are qalosaieqnu. Nanngi qotqajqa wau segi ojeqnu. Deqa nanngo gate a nanngi qa tulan areboleboleiyeqnu. ⁵ Tamo bei bei wo gurgurosib bubuqnsib bei na bei buqyosim di a awai oqas. A ururqajqa kumbra geregere dauryqasai di a awai oqasai. ⁶ Tamo bei a wauosim ingi yagwas di ingi meliamqa a osim uyqas. Deqa tamo lanaj bei a namoqna bosim ingi uyqasai. ⁷ O Timoti, ijo anjam e ni mermeqnum qaji endi ni qusim ino areqaloq di singilatime. Yimqa Tamo Koba a na powo emimqa ni ijo anjam kalil endi geregere poimqas.

⁸⁻⁹ Ni gaigai Yesus Kristus qa are qaloqne. A moisiq olo subq na tigelej. A Mandor Koba Devit aqa moma. E aqa anjam bole palontqnsim laqnam jeu tamo nanngi na e tamo uge bul nubqnsib gulbe koba eboqneb. Deqa nanngi na e ojsib tonto talq endi waibeb unum. Ariya nanngi Qotei aqa anjam getentqa keresai. ¹⁰ E tamo unqasari Qotei na giltnejrej qaji nanngi qa are qaloqnsim gulbe kalil qoboyeqnum. E degyeqnum. Di kiyaqqa? Qotei na nanngi elenjamqa nanngi Kristus Yesus aqa ñam na nambile osib a ombla so bole gaigai sqajqa deqa.

¹¹ Qotei aqa anjam bei unu. Anjam di gisan sai. Anjam di bole. Deqa iga gago areqaloq di singilatqa kere. Anjam agiende.

“Iga Yesus ombla moyobulem deqa iga a ombla olo nambile gaigai sqom.

¹² Iga gulbe kalil qoboiyoqnsim sinjila na tigellesqom di mondon iga Yesus ombla mandor kokba sqom.

Iga a qoreiyqom di a na kamba iga qoreigwas.

¹³ Iga aqa anjam dauryqa marsimqa olo dauryqa uratqom di Yesus a segi aqa anjam uratqa keresai. A dauryoqnsim sqas.”

Pol na Timoti minjej, “Ni Qotei aqa wau tamo bole soqne”

¹⁴ O Timoti, Kristen nanği ijo anjam deqa are walnjraim deqa ni na gaigai minjroqne. Osim Qotei aqa ɳamgalaq di nanği endegsim minjroqne, “Ninği anjam qudei qa laɳa laɳa ɳiriɳoqnaib. Osib ɳam qudei qa anjam na qotoqnaib. Anjam dena ninği aqaryainğwa keresai. Ninği anjam di qusib dauryqab di nuɳgo areqalo niɳaquesqas.”

¹⁵ O Timoti, ni Qotei aqa wau tamo boledamu sosimqa aqa anjam bole geregere palontogɳajqa sinjilaoqne. Yim Qotei a ino wau kalil qa tulaɳ arearetoqɳas. Deqa ni aqa ɳamgalaq di jemaimqasai. ¹⁶ Tamo qudei nanği anjam uge laɳa laɳa mareleɳeqnub deqa ni nanço anjam di qoreiye. Nanço anjam di tulaɳ ugedamu. Anjam dena tamo uɳgasari nanği are prugetɳjroqɳim nanği Qotei aqa kumbra torei uratoqɳqab.

¹⁷ Anjam di yu uge bulosim tulaɳ kobaqujaosim tamo uɳgasari nanği ugeugeinjroqɳas. Tamo aiyel anjam uge deqaji mareqɳub agi Himeneus Filetus wo. ¹⁸ Nanği aiyel anjam bole qa gam uratosib gisaɳ anjam endegsib mareqɳub, “Tamo uɳgasari kalil nanği nami subq na tigeleb koboej. Deqa nanği olo bunuqna subq na tigelqasai.” O

Timoti, gisaŋ anjam dena tamo ungasari qudei nami Yesus qa nanŋo areqalo siŋgilateb qaji nanŋo areqalo olo niñaqyetnjreqnu.

¹⁹ Qotei aqa segi tamo ungasari nanŋi tal ai bulosib siŋgila na tigelejunub. Tal aiq di Qotei aqa anjam endegsib nenŋrenyeb unu, “Tamo Koba a aqa segi tamo ungasari nanŋi qa qalie bole.” Anjam bei dego tal aiq di nenŋrenyeb unu, “Tamo kalil Tamo Koba aqa ñam ejunub qaji nanŋi kumbra uge uge qoreiyebe.”

²⁰ E yawo anjam bei mermqai. Tal kobaquja bei miligiq di tabir qudei gol na ti silva na ti gereiyeb. Tabir qudei ñamtaŋ na gereiyeb. Tabir qudei jagi na gereiyeb. Tabir qudei wau bole qa gereiyosib olo tabir qudei wau kiñilala qa gereiyeb. ²¹ Deqa tamo bei a kumbra uge kalil uratosim Qotei aqa ñamgalaq di une saiqoji sqas di a tabir wau bole qa gereiyeb qaji di bul sqas. Deqa a ñam bole osim Qotei aqa segi kumbra boleq di sosim Gate Koba Yesus geregere wauetoqnqas. A wau bole kalil yoqnqajqa tulaŋ kere na sqas.

²² Deqa Timoti, areqalo uge uge anŋro wala nanŋi dauryeqnub qaji di ni na qoreiye. Osim ni kumbra bole yoqnqajqa wauoqnsim Qotei qa ino areqalo siŋgilatoqnsim tamo ungasari nanŋi qalaqalainjroqnsim lawo na soqne. Tamo ungasari are bole ti sosib Tamo Koba aqa ñam na pailyeqnub qaji nanŋi ni ombla kumbra kalil di yoqniy.

²³ Tamo ungasari areqalo bole ti sosai qaji nanŋi nanari anjam laŋa laŋa mareleŋeqnub deqa ni nanŋo anjam di quoqnaim. Ni qalie, anjam dena qoto ti ñiriŋ ti tigelteqnu. ²⁴ Tamo Koba aqa wau tamo nanŋi anjam na qotoqnsib ñiriŋoqnaib. Nanŋi na

tamo ungasari kalil nanği kumbra bole bole enjroqnsib Qotei aqa anjam plaltosib minjroqnebe. Tamo qudei na nanği gulbe enjribqa nanği deqa niriñaib. Nanği kamba olo kumbra lawo nanği osornjroqnebe. ²⁵ Nanği lawo na Qotei aqa anjam gotranjo qaji tamo nanžo areqalo olo gereiyetnjroqnebe. Yim Qotei na nanžo are bulyetnjrimqa nanği aqa anjam bole poinjrim dauryqab. ²⁶ Nami Satan a tamo nanği di singila na ojesonaqa nanği aqa anjam dauryoqneb. Deqa Qotei aqa wau tamo nanği lawo na nanği tingitnjribqa nanği Qotei aqa anjam bole qa poinjrim olo areqalo bole osib Satan aqa banq dena jaraiyosib sawa boleq di sqab.

3

Diño bati jojomoqnimqa tamo nanği kumbra uge uge yoqnqab

¹ O Timoti, ni endegsi poimem. Mondon diño bati jojomoqnimqa gulbe gargekoba mandamq endi brantelenqab. ² Tamo nanği kumbra uge uge endeqaji yoqnqab. Nanği nanžo segi jejamu qa tulan areboleboleinjroqnqas. Nanği silali koba oqajqa are prugnjroqnqas. Nanği nanžo segi ñam soqtoqnsib diqoqnsib niriñ anjam koba maroqnsib tamo nanği misilinjroqnqab. Nanği nanžo ai abu nanžo anjam gotranjoqnqab. Tamo qudei na nanği aqaryainjroqnibqa nanği kamba olo nanği qa are boleinjroqnqasai. Nanği Qotei aqa kumbra bole kalil qoreiyoqnqab. ³ Nanği qalaqalaiyo kumbra dauryqa uratoqnqab. Nanği niriñoqnsib jeu atoqnsib olo jeu turyoqnqasai. Nanği yomu anjam gargekoba maroqnsib nanžo segi jejamu

taqatqajqa asginjroqñqas. Nanđi laña laña qotoqñsibqa tamo nanđi ñumoqñsib kumbra bole jeutoqñqab. ⁴ Nanđi tamo qudei nanđi ugeugeinjroqñqab. Nanđi urur kumbra uge uge yoqñqab. Nanđi kumbra di yqajqa ulaoqñqasai. Nanđi nanđo segi ñam soqtoqñsib mandam qa inđi inđi qa tulañ areboleboleinjroqñqas. Nanđi Qotei qa yala arearetnjroqñqasai. ⁵ Nanđi laña babañ na Qotei aqa kumbra bole dauryobuloqñsib sqab. Kumbra bole aqa siñgila nanđi yala poinjrqasai. O Timoti, tamo deqaji brantoqñibqa ni na nanđi beternjraim. Torei uratnjrsim isaq gile.

⁶ Tamo deqaji nanđi kumbra uge endegyeqñub. Nanđi uña qudei nanđo tal miligiq giloqñsib nanđi walawalainjroqñsib areqalo titetnjreqñub. Uña nanđi di areqalo bole ti sosai. Nanđi une gargekoba yeqñab nanđo une dena nanđi siñgila na ojeqnaqa nanđi kumbra uge uge yqajqa are prugnjqeqñu. ⁷ Uña nanđi di gaigai qalie oqajqa are qaloqñsib ariya nanđi anjam bole aqa utru poinjrqa keresaiinjreqñu. ⁸ Gisañ tamo nanđi di Qotei qa nanđo areqalo siñgilatosaieqñub. Nanđo areqalo tulañ niñaqejunu. Nami Janes Jambres wo nanđi aiyel Moses jeutoqñeb dego kere gisañ tamo nanđi na Qotei aqa anjam bole jeuteqñub. ⁹ Ariya nanđo kumbra di tulañ kobaqasai. Nami Janes Jambres wo nanđi aiyel kumbra deqaji yeqñabqa tamo unğasari kalil nanđi unoqñsib maroqñeb, “Nanđo kumbra di nanari.” Dego kere gisañ tamo nanđi kumbra uge uge yoqñibqa tamo unğasari kalil nanđi unoqñsib maroqñqab, “Nanđo kumbra di nanari.”

Pol na Timoti minjej, “Ni Qotei aqa anjam singila na ojesoqne”

¹⁰ O Timoti, ni nami e ombla soqnem deqa ijo anjam kalil e na plaltoqnem qaji di ni qalie. Ijo walwel ti ijo kumbra ti di ni qalie bole. E Qotei qa ijo areqalo singilatoqnsim ijo are miligi dego gaigai singilatoqnsim waukobaoqnem. Osim tamo ungasari nanqi qalaqalainjroqnsim singila na tigelooqnsim gulbe qoboioqnem. Di ni qalie bole. ¹¹ Antiok qure ti Aikoniam qure ti Listra qure ti dia jeu tamo nanqi na e kumbra uge uge ebeqnaqqa e jaqatiñ koba oqnem. Qure qureq di kumbra uge kalil e qa brantoqnej qaji di ni qalie. Ariya bati deqa Tamo Koba a na e aqaryaiboqnsiqa gulbe kalilq dena e oqnsiq taqal atoqnej. Deqa bini e bole unum. ¹² Ni qalie, jeu tamo nanqi na tamo ungasari kalil Kristus Yesus beteryesosib Qotei aqa kumbra dauryqa singilaeqñub qaji nanqi ugeugeinjroqñqab. ¹³ Tamo uge uge nanqi ti gisañ tamo nanqi ti tulañ ugeoqñqab. Ugeoqñsib gisañ anjam gargekoba maroqñib Satan na kamba dego nanqi olo gisa gisañjroqñqas. Yim nanjo kumbra di tulañ ugedamuqas.

¹⁴ Ariya Timoti, anjam iga nami ni mermonam qusim ino areqaloq di singilatem qaji di ni olo singila na ojesoqne. Ni iga qa bole qalieonum deqa ni degyoqne. ¹⁵ Nami ni angro kiñala sosimqa ni Qotei aqa anjam nenqrenq di so qaji di qalieosim bosim agi qalieosim unum. Anjam dena ni powo bole emonaqa ni Kristus Yesus qa ino areqalo singilatonamqa Qotei na ni padalo sawaq dena ej. ¹⁶ Qotei aqa anjam kalil nenqrenq di

so qaji di Mondor a segi na babtej. Anjam dena iga aqaryaigoqnsiqa gam bole osorgoqnsiqa gago areqalo tingitetgeqnu. Osiqa gago walwel gereiyetgoqnsiqa iga kumbra bole dauryqajqa sinjilatgeqnu. ¹⁷ Deqa anjam dena Qotei aqa tamo ungasari nanqi keretnjreqnaqa nanqi kumbra bole kalil yoqnsib wau bole bole ojeqnu.

4

Pol na Timoti minjej, “Ni Yesus aqa anjam palontqajqa tulanj sinjilaoqne”

¹ Qotei aqa Njiri Kristus Yesus wo nanjo njamgalaq di e ni sinjila na endegsi mermqai. Mondonj Yesus a lanj qureq na brantosim tamo ungasari kalil nambile so qaji nanqi ti nami morenej qaji nanqi ti peginjrqas. Osim a bati gaigai Mandor Koba sqas. ² Deqa ni Yesus aqa anjam palontoqne. Tamo ungasari nanqi ino anjam quqwa arearet-njroqnaqas kiyo asginjroqnaqas kiyo di unqum. Ni na nanqi tingitnjroqnsim dalnjroqnsim are tigeltetnjroqne. Ni asgimaiq. ³ O Timoti, ni que. Bunuqna tamo gargekoba nanqi Qotei aqa anjam quqwa asginjroqnimqa olo anjam utru bei bei quqwajqa are prugnjroqnaqas. Osib nanjo segi areqalo dauryosib anjam plalto tamo qudei nanqi metnjroqnb bosib gisanj anjam minjroqnb qusib arearetnjroqnaqas. ⁴ Deqa nanqi anjam bole quqwa uratosib lanja sa anjam quqwajqa dab atoqnaqab. ⁵ Ariya Timoti, ni kumbra degyaim. Ni gaigai areqalo bole na sosimqa gulbe ti jaqatinj ti qoboiyoqne. Osim ni na Yesus aqa anjam bole tamo ungasari nanqi minjre minjre laqne. Ni nanqi

aqaryainjrqaqqa wau ti unum deqa ni wau di keretosim yoqne.

Pol a moiqa bati jojomej

⁶ Ni qalie, jeu tamo nanği na e lubsib moiyoṭbqa bati jojomqo. Israel nanği wain bilentoqnsib Qotei atraiyeqñub dego kere e moisiyqa ijo leñ aiqas qaji dena Qotei atraiyobulqai. ⁷ Tamo nanği gurguroqnsib bubuñeqñub dego kere e nami siñgila na ururosım Yesus dauryoqñem agi bini e degyeqñum. E ijo wau kalil kobotonum. E Qotei qa ijo areqalo siñgilatoqñem di e uratosaiyoqñem. Agi bini e ijo areqalo di siñgila na ojejunum. ⁸ Tamo nanği gurguroqnsib bubuñeqñub di nanği awai oqajqa. Ijo awai bole agi Qotei a lañ qureq di atej unu. E awai di oqajqa tariñoqnsım unum. Ijo awai agiende. Mondon Tamo Koba a na e tamo bole une saiqoji qa merbqas. Di ijo awai bole. Tamo Koba a kumbra bole tiñtin na tamo unğasari nanği peginjrqa. Peginjrqa bati deqa a awai bole di e ebqas. A e segi awai ebqasai. Tamo kalil Yesus a lañ goge na brantim unqajqa deqa arebolebolein-jreqnu qaji nanği dego awai bole enjrqa.

Pol na Timoti minjej, “Ni ijoq urur au”

⁹ O Timoti, ni ijoq urur au. ¹⁰ Ni que. Demas a mandam endeqa kumbra qa tulañ areareteqnu. Deqa a na e urathosiqa Tesalonaika qureq gilej. Kresens a Galesia sawaq gilej. Taitus a Dalmesia sawaq gilej. ¹¹ Aqo Luk wo segi unum. Deqa ni Mak osimqa endeq boiy. Mak a tamo bole. A na e aqaryaiboqnsiqa wau bole yeqnu. ¹² Tikikus agi e na qarinyonam Efesus qureq aiyej.

¹³ Ni ijoq bqa osimqa ijo gara jugo Troas qureq di uratem qaji di osim osau. Agi Karpus aqa talq di uratem unu. Ijo buk qudei dego osau. Ariya ijo pepa lulumo qudei wagne nanjo jegara na gereiyo qaji di dego osim osbetbe. Ni are walmaiq.

¹⁴ Bras na inji inji gereiyo tamo aqa ñam Aleksander a na e ugeugeiboqnej. Deqa mondon Tamo Koba a na kamba Aleksander ñolawotqas. ¹⁵ Aleksander a nami iga jeutgoqnsiqa gago anjam tulan ugeugeiyoqnej. Deqa ni a qa geregere ñam atogne.

¹⁶ Jeu tamo nanji nami e ojsib anjam pegiyo talq di tigeltbeb bati deqa tamo bei na e taqbosai. Tamo kalil nanji e uratbosib jaraiyeb. Deqa e Qotei endegsi pailyem, “O Abu, ni nanjo une deqa olo kambatnjraime.” E degsi Qotei pailyem. ¹⁷ Ariya Tamo Koba Yesus a segi na e taqbosiqa singila ebej deqa e anjam pegiyo talq di tigelosim Yesus aqa anjam bole mareqnamqa sawa bei bei qaji nanji quoqneb. Qotei na e aqaryaibosiqa banjuwan nanjo medabuq na e osiq taqal waibej. ¹⁸ Deqa e endegsi qalieonum. Jeu tamo nanji boqnsib kumbra uge uge ebqa maroqnib Qotei na e aqaryaiboqnsim nanjo banq dena e oqnsim taqal waiboqnqas. Osim bunuqna a na e lan qureq osi oqsim dia e taqatbosim ijo Mandor Koba sqas. Deqa iga bati gaigai aqa ñam soqtoqnqom. Bole.

¹⁹ O Timoti, ni na ijo kaiye anjam endi osim tamo nanji Onesiforus aqa talq di unub qaji nanji ti Prisila Akwila wo nanji koba na minjime.

²⁰ Erastus a Korin qureq di unu. Trofimus a Mile-

tus qureq di ma ti sonaq e na uratem unu. ²¹ Ni ijoq urur boqumat. Ni tariñoqnim ulili bati bo uge.

Yubulus na Pudens na Linus na Klodia na nanği qolqe Kristen tamo kalil nanği ti koba na kaiye anjam endi inoq qariñyonub.

²² Tamo Koba a na ino qunun geregere taqateme. Osim niñgi kalil qa are boleiyeme. Bole.

Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini,
2014

copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 11 Nov 2022 from source files dated 9 Oct 2020

0eb339dc-c20a-5065-9483-338933d97585